

SURANA PETRUS MOBHAA-BHAANA

POGAU BHAA-BHAANA

Surana Petrus Mobhaa-bhaana sii apatujuakea to manga mia moosena Al Masi modhaangiana i saangua i weta i napana Asia Maidhidhi. Manga incia atosarongi "uumati ipilina Aulata'ala." Ma'anana sura incia sii satotuuna to apekatangkaaka iimanina manga mia mobacea motangasaana monamisina kapisaki tee kasikisaa roonamo aparacaea tee Al Masi. Petrus audhaniaka manga mia mobacana sura incia sii to pokaiana tee Lele Malapena Isa Al Masi momembalina jaminana dhadhina manga incia. Roonamo Isa Al Masi amatemo, adhadhi pendua tee ajanji bheaumba uka pendua. Rampaakanamo giu incia sumai manga incia tabeana arela o totona incana tee atarai kanarakaa, tee asadaria ande o kanarakaana sumai satotuuna o kauji, buaka manga incia atotuu-totuu aparacaea tee Al Masi. Tee uka tabeana ayaakini ande manga incia bheabalasia Kawasana Opu wakutuuna Isa Al Masi aumba pendua.

Mencuana soo apekatangka iimanina mobacea motangasaana monarakaana sumai, Petrus aemani mamudhaakana manga incia adhadhi apokana mboomo manga mia moosena Al Masi.

Antona

Porikanaana pogau 1:1-2

Naasehati mamudhaakana taudhania ande o
Aulata'ala mopasalaamatina maanusia 1:3-
12

Naasehati mamudhaakana tadhadhi hususu to
Aulata'ala 1:13--2:10

Iwaajibbuakana mia moosena Al Masi i wakutu-
una kanarakaa 2:11--4:19

Kalapena inca tee kalaianina mia moosena Al
Masi 5:1-11

Kapadhaa 5:12-14

Salamu

1:1-2

¹ Minaaka i Petrus, rasuluna Isa Al Masi. Sura incia sii kulambokoa to bhari-bharikomi, siitumo manga mia ipilina Aulata'ala momembalina mia dhaga tee modhaangiana i iapai-iapai i Poropinsi Pontus, Galatia, Kapadokia, Asia Maidhiidhi, tee Bitinia.

² Ingkomi utopili apokana tee haejatina Aulata'ala o Amata, tee apekangkiloakakomi tee Rohina mamudhaakana uta'ati parintana Isa Al Masi tee upotibhaaka kapasikina raana.*

Maasangia upotibhaaka rahumati tee dhadhi malape motaralabhi-labhi minaaka i Aulata'ala.

Kaharapu Momaoge Ituju

1:3-12

³ Bhari-bharia kapujia to Aulata'ala o Amana Isa Al Masi Oputa Momalanga roonamo tee

* **1:2 1:2** upotibhaaka kapasikina raana: Alaloi raana, Al Masi mangapekangkilo. I nuncana Pojanjia Mangenge, kapasikina raana binata amenturu atopake to pekangkiloana karo (kamata: Im. 14:6-7) tee kahapusuana dosa (kamata: Im. 16:14-16.)

kaasina incana Aulata'ala momaoge padhamo mangapalaahiri pendua alaloi dhadhina pendua Isa Al Masi minaaka i tanga-tangana mia mate, sabutuna o dhadhita abukeeka kaharapu momatangka,

⁴ to tatarima tinauraka ipasadiaakana Aulata'ala to uumatina, siitumo tinauraka idhikana i sorogaa to ingkomiu, sabutuna inda amembali atopabinasa, inda amarombu, tee inda amalau.

⁵ Bhari-bharia sumai to ingkomiu, roonamo uparacaea tee Aulata'ala. Sumaimo Aulata'ala bheajaganikomiu tee kuasana sabutuna upotibhaaka kasalaamati mopadhana ipasiapuakana mamudhaakana atinda i aahirina zamani tuaapa o carana Aulata'ala mangapasalaamati.

⁶ Rampaakanamo sumai ukaunde-undemo, moomini sii-sii uporikanapo unamisi kasukara tee pegiu-giuna kapancoba.

⁷ Bhari-bharia giu incia sumai mamudhaakana to ubukutiiaka iimanimiu, umpuu-mpuu uparacaea i Kawasana Opu atawa inda. Iimanimiu mboomo bulawa motouji tee atopekangkilo tee cara atotunu i nuncana waa. Ande o bulawa sumai o bara inda mobakaa tee atouji mboo sumai, ntaranamo uka o iimanimiu mobakaa, atantum alabhi akoharagaa minaaka i bulawa. Ande o iimanimiu amatangka ulaloi manga kapancoba sumai, ingkomiu bheupotibhaaka kapujia, kamuliangi, tee kahoromati i wakutuuna Isa Al Masi apatiumba karoni i eona umbaana naile itu.

⁸ Ingkomiu umaasiaka Isa, moomini indapo

ukamatea. Tee ingkomiu uparacaeaia moomini sakawana sii-sii indapo ukamatea. Rampaakanamo sumai ingkomiu ukaunde-undemo sampe inda umembali ubhoasakea tee manga pogau, tee o kaunde-undemiu sumai abukeaka kamuliangi minaaka i sorogaa.

⁹ Ingkomiu ukaunde-unde roonamo uparacaea, ande ingkomiu uparacaea tee Isa Al Masi dhaanamo upotibhaaka opea iharapumiu, siitumo kasalaamatina dhadhimiu.

¹⁰ Kasalaamatimo incia sumai itilikina tee iparakisaana manga nabii. Manga incia padhamo apekilala pokaiana tee rahumati idhawuakana Aulata'ala to ingkomiu.

¹¹ Manga incia aparakisaia tuaapa tee naepia o giu ipekilalaakana Rohina Al Masi modhaangiana i nuncana karoni manga incia sumai bheamembali,[†] siitumo o Rohi mopadhana modhawuna kasakusii pokaiana tee sagala giuna kanarakaa bheinamisina Al Masi tee sagala giuna kamuliangi bhemoumbana sapadhana incia sumai.

¹² To manga nabii sumai padhamo atopaumbaaka ande opea ipewauna manga incia mencuana to kalapena karoni. Manga incia alaiankomiu wakutuuna apakoleleaka manga giu mopadhana irangomiu minaaka i manga mia mobhawana Lele Malapena Isa Al Masi tee kuasana Rohina Aulata'ala ilambokona minaaka

[†] **1:11 1:11** *tuaapa tee naepia o giu ipekilalaakana Rohina Al Masi modhaangiana i nuncana karoni manga incia sumai bheamembali: Atawa o kaburina Yunani incia sii uka amembali akoma'ana, "Incema o mia incia sumai tee naepia Incia bheumba."*

i sorogaa. Malaa'ekati uka gauna amatau lele incia sumai!

Kakemba to Dhadhi Mangkilo

1:13-25

¹³ Rampaakanamo sumai pasiapumea o akalana budimiu. Kojagamo tee uharapumo mpuu tee rahumati bheibhawana to ingkomiu wakutuuna Isa Al Masi aumba naile itu.

¹⁴ Mboomo manga anaana momalape, ta'atimo tee Aulata'ala, tee bholi uose nawusuumiu mboomo wakutuuna indapo upomatau tee Aulata'ala i piamo itu.

¹⁵ Maka ingkomiu tabeana umangkilo i nuncana bhari-bharia giu ipewaumiu, apokana mboomo Aulata'ala mokembakomiu sumai amangkilo.

¹⁶ Roonamo i nuncana Kitabi Momangkilo padhamo atoburi, "Ingkomiu tabeana umangkilo roonamo laku kumangkilo."

¹⁷ Incia satotuuna o Kawasana Opu mohaakimuna bhari-bharia mia tee ka'adili apokana tee opea mopadhana ipewauna manga incia samia-samia. Ande ingkomiu usarongia Ama, sumaimo ingkomiu tabeana uhoromatia kangengena dhaangiapo umboore i dunia sii mboomo mia dhaga.

¹⁸ Roonamo ingkomiu umataua, ande o Aulata'ala padhamo atolosikomiu minaaka i dhadhimiu mosia-sia itinaurakaakana minaaka i opu-opuamiu. Incia atolosikomiu mencuana tee bara momembalina mobinasa mboomo bulawa atawa o pera,

¹⁹ maka tee giu mokoharagaa mpuu; si-itumo tee raana Al Masi, raana Anana Dumbana Aulata'ala inda mokokadhingkula tee inda mokobalaci.

²⁰ Al Masi padhamo apilia Aulata'ala waku-tuuna o dunia indapo atopadhaangia. Maka siimpomo bheapatokamataaka Karona i waku-tuuna amakasu i eo-eona kapadhaana zamani mamudhaakana apasalaamatikomiu.

²¹ Alaloi Al Masi sumai ingkomiu uparacaea tee Aulata'ala mopadhana mopadhadhia pendua minaaka i mate tee Incia uka amuliangia. Jadi o Aulata'ala iparacaeamiu tee o Aulata'ala uka o tampana udhika kaharapumiu.

²² Ingkomiu padhamo upekangkilo karomiu roonamo uta'ati tee kabanara. Tee mboo sumai, ingkomiu umembali umaasiaka bhari-bharia witinaimiu sa'agama tee karelana totona incamiu. Rampaakanamo sumai ingkomiu tabeana upomaamaasiaka podho-podho ingkomiu tee mpuu-mpuuna incamiu minaaka i ngangaranda momangkilo.

²³ Roonamo alaloi firimanina Aulata'ala modhadhi tee mobakaana sumai, ingkomiu umembalimo maanusia bhaau inda molaahirina minaaka i maanusia, maka molaahirina minaaka i Ama mobakaa.

²⁴ Roonamo i nuncana Kitabi Momangkilo padhamo atoburi:

"Bhari-bharia maanusia mboomo rumpu,
kamuliangina mboomo kamba-kambana
rumpu.

Rumpu amalau, tee o kambana apotiburi,

25 maka o firimanina Kawasana Opu abakaa sa'umuraa."
Firmanani sumai o Lele Malape mopadhana ipakoleleakana to ingkomiu.

2

Isa Al Masi o Bhatu Parapuu

2:1-10

¹ Rampaakanamo sumai, bhanakamea bhari-bharia giu momadhaki, pekatipu, munaafiki, gígibulu, tee bhari-bharia fitanaa.

² Ingkomiu tabeana mboomo anaana siimpo molaahiri momatuukana bhorokona susuna firimanina Aulata'ala momurunii, mamudhaakana tee giu incia sumai ingkomiu uhanda upomakasu tee Aulata'ala tee upotibhaaka kasalaamati.

³ Ingkomiu tabeana upewau mboo sumai, roonamo padhamo unamisia karomiu o kalapena Isa Oputa Momalanga.

⁴ Rampaakanamo sumai, umbamo i Isa Oputa Momalanga. Incia mboomo bhatu modhadhi, bhatu ibhanakana maanusia roonamo atoabhi inda akoguna, maka apilia Aulata'ala amembali bhatu mokoharagaa i aroana.

⁵ Ingkomiu uka mboomo manga bhatu modhadhi. Bhari-bharikita mangapaposaangu Aulata'ala to tamembaliaka bhanuana, siitumo tampana mbooresana Rohina Aulata'ala. I nuncana bhanua incia sumai, ingkita tamembali manga imamu mosaalihi ihususuaka to talaianiaka Aulata'ala, tee alaloi Isa Al Masi

manga pasombaana rohani ipeeluna Aulata'ala sumai tabhaweana to Aulata'ala.

⁶ Roonamo padhamo atoburi i nuncana Kitabi Momangkilo,

"Kamatea, Iaku padhamo kudhika saangu bhatu i Sion,
saangu bhatu mobhaa-bhaana, motopili tee momaalina haragaana.

Mia moparacaeana tee Incia inda bheatopekaea."

⁷ Rampaakanamo sumai, to ingkomiu moparacaeana, bhatu sumai amaali o haragaana, maka to manga mia inda moparacaea amembali mboomo,

"Bhatu ibhanakana manga tukana bhanua amembalimo bhatu parapuu mobhaa-bhaana,"

⁸ tee

"amembalimo bhatu itosunuakana mia, tee imanduliakana manga incia."

Manga incia atosunu roonamo inda ata'ati tee firimanina Aulata'ala. Manga incia apewau mboo sumai apokana mboomo mopadhana ihaejatiakana Aulata'ala.

⁹ Maka ingkomiumo o mia ipilina Aulata'ala, manga imamu molaianina Raja, lipu momangkilo, uumatina karoni o Aulata'ala, mamudhaakana upakoleleaka bhari-bharia giu mo-maoge ipewauna Aulata'ala, mopadhana mopalimbakomiu minaaka i kalalanda to upesua i nuncana kainawana inda momentela.

2:6 2:6 Yes. 28:16. **2:7 2:7** Zab. 118:22. **2:8 2:8** Yes. 8:14-15.

2:9 2:9 Limb. 19:5-6; 7:6; 14:2; Tit. 2:14.

¹⁰ I piamo itu ingkomiu mencuana saangu uumati, maka sii-sii ingkomiu umembalimo uumatina Aulata'ala. I piamo itu ingkomiu inda upotibhaaka kaasi minaaka i Aulata'ala, maka sii-sii ingkomiu upotibhaakamea.

*Kaudhaniaka to Tadhadhi Tamembali Bhatu-
ana Aulata'ala*
2:11-17

¹¹ E manga witinai imaasiakaku, roonamo ingkomiu mboomo mia moumba tee o pande bhose i kolipuna, roonamo lipumiu i sorogaa, mencuana i dunia sii. Rampaakanamo sumai, kunaasehatikomiu mamudhaakana upekaridhoa o karomiu minaaka i nawusuuna dunia mopoe-wangina mobhalina rohimiu.

¹² Ingkomiu tabeana ukopemingkui malape i tanga-tangana manga mia inda momatauna Aulata'ala, mamudhaakana wakutuuna araeakakomiu umembali mia madhaki, manga incia amembali akamata pewaumiu momalape, tee mboo sumai manga incia amuliangi Aulata'ala i wakutuuna Incia aumba pendua.

¹³ Rampaakanamo Aulata'ala, ingkomiu tabeana uta'ati tee bhari-bharia maanusia mokenina kuasa, malape to Kaisar* mokenina kuasa momalanga,

¹⁴ atawa to bhari-bharia gubernuru isusuna Kaisar to ahukumu mia mopewauna kadhaki tee apuji manga mia mopewauna kalape.

* **2:13 2:13** *Kaisar*: Saro to rajana Pamarintana Roma.

¹⁵ Roonamo giumo incia sii ipeeluna Aulata'ala, siitumo mamudhaakana tee pewaumiu momalape ingkomiu amembali ututubhi ngangana manga mia mokabhongo-bhongo.

¹⁶ Ingkomiu tabeana udhadhi mboomo maradhika, maka bholi upakea o kamaradhikamiu sumai to ututubhiaka giu madhaki, maka upakea to umembaliaka bhatuana Aulata'ala.

¹⁷ Horomatimea bhari-bharia mia, maasiakea o witinaimiu sa'agama, maekamo tee Aulata'ala, tee uhoromatimea rajamiu.

*Kanarakaana Al Masi amembali Kaadhari
2:18-25*

¹⁸ E manga witinai momembalina bhatua, ta'atimo i opumiu tee uhoromatia mpuu, mencuana tangkanamo tee manga incia momalapena incana tee momaluluna ngangarandana, maka tee manga incia momasegana uka.

¹⁹ Roonamo amalape ande rampaakanamo tasadara taose kapeeluana Aulata'ala, ingkita tarela tatanggo kanarakaana pewau inda mo'adili.

²⁰ Ande ingkomiu usala kasiimpo utohukumu maka usabara, bholi uharapu o Kawasana Opu abarakatikomiu, roonamo ingkomiu utotuu-totuu usala. Maka ande ingkomiu utopanakaraa, garaaka o kalaianimiu amalape tee usabara, sumaimo Aulata'ala bheabarakatikomiu.

²¹ To giumo incia sumai mbakana o Aulata'ala akembakomiu, roonamo Al Masi uka padhamo anarakaa to ingkomiu tee padhamo adhikaakakomiu sandara mamudhaakana uose pemingkuina.

22 "Incia inda apewau dosa,
tee inda dhaangia o pogau mopekati
molimbana minaaka i ngangana."

23 Wakutuuna manga incia amangkatua, Incia inda abalasia tee kamangkatu. Wakutuuna anarakaa, Incia inda apekahanda, maka apasaraakaakea o giu incia sumai i Aulata'ala mopekahaakimuna tee ka'adili.

24 "Incia padhamo atanggo manga dosata" tee badana i kau salib mamudhaakana tabebasi minaaka i kuasana dosa, tee tadhadhi taose kapeeluana Aulata'ala, roonamo "alaloi manga kambelana iuntoakana kapiimiu."

25 I piamo itu ingkomiu mboomo manga dumba mosaladhala, maka sii-sii ingkomiu umbulimo uose Isa, Gembala tee Mojaganina Inyawamiu.

3

Tadhadhi Taposaangu tee Umaneta tee Bhawineta

3:1-7

1 Mboomo uka ingkomiu manga bhawine mokoumane, ta'atimo tee umanemiu mamudhaakana ande dhaangia minaaka i manga incia inda moparacaeana tee firimanina Aulata'ala, inda afaraluu utumpua to aparacaea tee Al Masi, maka tee pewaumiu sumai o umanemiu amembali aparacaea,

2 roonamo akamata kangkilona incamiu tee dhadhimiu mosaalihi.

3 Kakesamiu bhohi tangkanamo atokamata i

sambali, mboomo ubheloki buluamiu, atawa upoajoaka bulawa tee pakea momaali,

⁴ maka tabeana o kakesamiu aminaaka i nuncana baatinimiu tee apoajoaka giu inda momembalina mobinasa, roonamo aminaaka i dhadhimiu momalulu tee motanangi. Siimo kakesa mokoharagaa i matana Aulata'ala.

⁵ Roonamo tee cara mboomo sumai manga bhawine mosaalihi i piamo itu apekakesa karona, siitumo manga bhawine moharapuna tee Aulata'ala. Manga incia ata'ati tee umanena,

⁶ apokana uka tee Sarah. Incia ata'ati i Ibrahim tee ahoromatia roonamo aabhia opuna. Sii-sii ingkomiu umembalimo anana Sarah ande ingkomiu upewau kalape tee inda umaeka tee opeapo uka.

⁷ Mboomo uka manga umane mokobhawine tabeana u'arifu mamudhaakana udhadhi upomalape tee bhawinemiu roonamo umataua ande o bhawinemiu sumai o mia momalute, tee rampaakanamo sumai manga incia tabeana uhara-gaangia, roonamo manga incia tee ingkomiu apokana bheutorahumatiaka dhadhi mobakaa minaaka i Aulata'ala. Tee udhadhi mboo sumai inda dhaangia bhemojoli-jolina do'amiu.

Kaasi tee Dhadhi Pomalape

3:8-12

⁸ Aahirina ingkomiu tabeana usafikiri, upofadhufadhuliaka, umaasiakea bhari-bharia witi-naimiu sa'agama, amalulu o ngangarandamiu, tee inda usombo.

9 Bholi ubalasi kadhaki tee kadhaki, kamangkatu tee kamangkatu. Maka ubalasi manga giu incia sumai tee kabarakati minaaka i Aulata'ala, roonamo to giu incia siimo akembakomiu Aulata'ala mamudhaakana ingkomiu umembali utarima kabarakati minaaka i Incia.

¹⁰ I nuncana Kitabi Momangkilo atoburi mboosii,

"Incema-incema gauna moni'imatina dhadhina tee gauna anamisi dhadhi momalape, tabeana ajagania o dhelana mamudhaakana inda abhoasaka pogau momadhaki, tee ajagania o bhiwina minaaka i bhoasaka mopekagau tee mopekati-puna.

¹¹ Incia tabeana apekaridho minaaka i kadhaki tee apewau momalapena.

Incia tabeana apeelo dhadhi mopomalape tee atorotorosu a'usaha to apotibhaakea.

¹² Roonamo matana Kawasana Opu atiliki manga mia mobanara, tee o talingana aperangoi do'ana manga incia.

Maka o rouna Kawasana Opu aewangi manga mia mopewauna kadhaki."

Tanaraka tee Kasabara

3:13--4:6

¹³ Atantum o inda dhaangia o mia bhemopacilakakomiu ande ingkomiu uraji upewau giu momalape!

¹⁴ Maka moomini unarakaaka kapeeluana Aulata'ala, ingkomiu bheumasanaa! Bholi umaeka tee incemapo uka, tee bholi umeri.

¹⁵ Maka umuliangimea o Al Masi i nuncana ngangarandamiu tee upamembalia Oputa Mo-malanga, tee sadioo usiapu udhawu kalawani to bhari-bharia mia moabhaakana kaharapu modhaangiana i karomiu, tee ulawania tee kalu-luna ngangarandamiu tee u'adatia.

¹⁶ Antona ngangarandamiu tabeana amangk-ilo mamudhaakana ande dhaangia o mia mofitanaakomiu rampaakana o pemingkuimiu momalape tee o dhadhimiu mopoosena tee Al Masi, sumaimo o mia mobancikomiu sumai bheamaea.

¹⁷ Salabhina unarakaaka roonamo upewau kalape, maka o giu incia sumai o kapeeluna Aulata'ala, tee unarakaaka roonamo upewau madhaki.

¹⁸ Roonamo Al Masi uka anarakaa sampearomea to atanggoaka bhari-bharia dosana maanusia; Incia inda akodosa maka amate to mia mokodosa, mamudhaakana apapomalape pokaiana maanusia tee Aulata'ala. Inciamo badana padhamo atopekamate, maka Incia apadhadhia pendua, *malape i nuncana dunia motokamata sii tee uka i duniana rohi*.*

¹⁹ I duniana rohi sumai Incia alingka apakawaaka Lele Malapena Aulata'ala to manga rohi mototorongku,

²⁰ siitumo manga rohi inda mota'atina tee

* **3:18 3:18** *malape i nuncana dunia motokamata sii tee uka i duniana rohi*: "Duniana rohi" asusuaka dunia iapai Rohina Aulata'ala akarajaa atawa dhadhina mia i sorogaa. Motindana mpuu, badana Isa Al Masi atopekamate kasiimpo atopadhadhi pendua sabutuna alabhi minaaka i badana maanusia mobiasa, roonamo amembali adhadhi i duniana maanusia, duniana rohi, tee i sorogaa. **3:20 3:20** Bhaa. 6:1--7:24.

Aulata'ala i zamanina Nabii Nuh. Wakutuu incia sumai o Aulata'ala asabara aantagi Nabii Nuh kangengena akarajaa bhangkana. Tangkanamo walu mia o mia modhaangiana i nuncana bhangka maoge† motopasalaamatina minaaka i mawa ogena sumai.

²¹ Kajadiana uwena mawa sumai amembali tandana papebhahoka, siitumo mopasalaa-matikomiu sii-sii. Papebhahoka sumai mencuana to apailaaka karombu minaaka i badamiu, maka amembali saangu tanda ande ingkomiu uemani i Aulata'ala mamudhaakana arahumatiakakomiu antona ngangaranda momangkilo alaloi dhadhina Isa Al Masi pendua minaaka i mate.

²² Isa apenemo i sorogaa tee auncura i weta kaanana Aulata'ala. Iwe sumai bhari-bharia malaa'ekati, bhari-bharia kuasa tee pamarinta atungku tee Incia.

4

¹ Al Masi padhamo anarakaa o badana i dunia sii. Rampaakanamo sumai ingkomiu uka tabeana upekatangkea o karomiu mamudhaakana upasiapuaka badamiu to anarakaa. Roonamo mia motarimana kanarakaa i nuncana dhadhina, siitumo o mia mopadhana momambuakana karonu to aunto apewau dosa,

² tee mboo sumai kangengena dhaangiapo adhadhi i dunia sii indamo aose nawusuuna, maka incia aose kapeeluaana Aulata'ala.

† **3:20 3:20** *walu mia o mia modhaangiana i nuncana bhangka maoge*: Siitumo Nuh tee bhawinena, talu miaia anana umane: Ham, Sem, tee Yafet, tee bhawinena manga incia samia-samia.

³ I piamo itu ingkomiu amangenge upewau giu imaasiakana manga mia inda momatauna Aulata'ala. Wakutuu incia sumai o dhadhimiu tangkanamo upakea to upebula. Ingkomiu uose nawusuumiu, upekalango-lango, ukokariaa, usumpu-sumpu, tee usomba barahala motolarangi.

⁴ Sii-sii manga mia inda momatauna Aulata'ala sumai amente roonamo ingkomiu inda udhadhi upoose tee manga incia i nuncana dosa inda mokokapadhaa tee rampaakanamo sumai manga incia afitanaakomiu.

⁵ Maka naile itu manga incia tabeana apotanggojawapuakea i Aulata'ala mosiapuna to mo'adilina mia modhadhi tee mia momate.

⁶ Rampaakanamo sumai o Lele Malape atopakoleleaka uka i mia momate. Sabutuna moomini manga incia padhamo atohaakimu i dunia sii apokana tee bhari-bharia maanusia, maka manga incia adhadhi mboomo rohi aose kapeeluana Aulata'ala.

Dhadhina Mia Moosena Al Masi

4:7-11

⁷ Kapadhaana bhari-bharia giu amakasumo. Rampaakana sumai, kuasaimea o karomiu tee ukojaga-jagamo mamudhaakana umembali udo'a.

⁸ Minaaka i bhari-bharia giu incia sumai maka mofaraluuna mpuu satotuuna: Ingkomiu tabeana utotuu-totuu upomaamaasiaka podho-podho ingkomiu, roonamo tee upomaamaasiaka, sumaimo ingkomiu bheupo'ampo'amponi dosa uka.

⁹ Ingkomiu tabeana upopepapepago podho-podho ingkomiu i bhanuamiu tee bholi upeenci.

¹⁰ Ingkomiu samia-samia padhamo utarima rahumati moposala-sala minaaka i Aulata'ala. Roonamo ingkomiu o mia motanggojawapuakana kabarakatina Aulata'ala, ingkomiu tabeana upolailaiani to kalapena bhari-bharikomiu.

¹¹ Mia mohotubaana, tabeana ahotubaa mboo mia mopakawaakana firimanina Aulata'ala, tee mia molaianina mia mosagaanana tabeana alai-iani tee kakaana rahumatina Aulata'ala, mamudhaakana Aulata'ala atomuliangi i nuncana bhari-bharia ipewauna alaloi Isa Al Masi. Inciamo mokokamuliangina tee mokokuasana to sa'umurua! Aamin.

*Tanaraka Tamembali Mia Moosena Al Masi
4:12-19*

¹² Manga witinai imaasiakaku! Ingkomiu sii-sii unaraka mpuu roonamo tangasaana utouji tee bholi umente kabilanga mboomo unamisi dhaangia tee saangu giu inda momentela i karomi.

¹³ Maka ukaunde-undemo roonamo uose unamisi kanaraka upobhawa-bhawa tee Al Masi. Tee mboo sumai ingkomiu bheukaunde-unde mpuu wakutuuna o kamuliangina Al Masi apatokamatea.

¹⁴ Masanaamo ande ingkomiu utohina rampaakana saron Al Masi, roonamo Rohi momulia siitumo o Rohina Aulata'ala modhaangiana i nuncana karomi.

¹⁵ Rampaakanamo sumai bholi dhaangia samia uka minaaka i tanga-tangamiu monarakaana

roonamo umembali pande pekamate, pande manako, mia madhaki atawa mocampuruna urusana mia mosagaanana.

¹⁶ Maka ande unarakaaka roonamo ingkomiu moparacaeana tee Al Masi, bholimo umaea rampaakanamo giu incia sumai. Ingkomiu tabeana upujimo Aulata'ala roonamo ubhawa sarona Al Masi.

¹⁷ Akawamo wakutuuna o Aulata'ala ahaakimu dunia, tee mobhaa-bhaana ihaakimuna siitumo uumatina karonu. Ande o kahaakimu sumai apepuua minaaka i ingkita, tuaapa bhemomembalina naile itu tee manga mia inda moparacaeana tee Lele Malapena Aulata'ala?

¹⁸ Mboomo motoburina i nuncana Kitabi Mombangkilo,

"Ande o mia mobanara amarasaimo mpuu to asalaamati,
tuaapa bhemomembalina tee manga mia inda momatauna Aulata'ala tee mokodosa?"

¹⁹ Rampaakanamo sumai, ande dhaangia manga mia monamisina kanarakaa roonamo kapeeluna Aulata'ala, mia incia sumai tabeana amalape o pewauna tee apasarakaaka karonu i Aulata'ala mopadhaangiaia. Aulata'ala sadia abukutiiakea o janjina.

5

Gembalaakea o Dumbana Aulata'ala

5:1-11

¹ Iaku kuemani mpuu i manga kapalana jama'a modhaangiana i tanga-tangamiu. Iaku kupokana tee ingkomiu roonamo iaku uka o kapalana

jama'a. Mencuana soo incia sumai, maka iaku uka padhamo kukamataakea tee matakuru karoku o kanarakaana Al Masi tee iaku uka bhekupoose tee Al Masi kutarima kadhawu i nuncana kamu-liangina wakutuuna Aulata'ala apatokamataakea i aroana mia bhari naile itu.

² Rampaakanamo sumai, kuemani mpuu ugembalaakea o gulumana dumba ipasaraakaakana Aulata'ala* to ingkomiu tee ngangaranda momasanaa mboomo kapeeluaana Aulata'ala. Bholi unamisi utopakisaa tee bholi upeelo laba, maka ukarajaamea o tugasimiu sumai tee mpuu-mpuuna incamiu.

³ Pewaumiu bholi kabilanga mboomo mia mokokuasaina mia modhaangiana i tambena tanggojawapuna, maka umembalimo polanciringa momalape to manga gulumana dumba sumai.

⁴ Tee wakutuuna Gembala Momalanga sumai aumba naile itu, ingkomiu bheutarima kamu-liangi, siitumo saangu mahakota inda momembalina momalau.†

⁵ Mboomo uka ingkomiu, e manga mia mangura, ta'atimo tee manga mancuaana. Bhari-

* **5:2 5:2** *ugembalaakea o gulumana dumba ipasaraakaakana Aulata'ala:* Iwe sii o Petrus apakoleleaka kasameana Isa to karonu wakutuuna manga incia apokawa i Tawona Galilea (kamata Yah. 21:15-17.). Sii-sii o Petrus apakawaaka kasamea mopokana to manga gembalana jama'a mamudhaakana manga incia a'urusu manga jama'ana samia-samia. † **5:4 5:4** *mahakota inda momembalina momalau:* I zamanina Petrus, mia mokaana i pologoa bheapotibhaaka mahakota motokarajaana minaaka i tawana rumpu bhemomalauna. Ma'anana kamuliangi incia sii bheabakaa.

bharikomiu tabeana sadia upaporitambea o karomiu tee mia mosagaanana. Roonamo i nuncana Kitabi Momangkilo atoburi mboo sii,

"Aulata'ala abhali mia mosombo,

maka o mia mopaporitambena karon a ad-hawua rahumati."

⁶ Rampaakanamo sumai, paporitambemea o karomiu i tambena limana Aulata'ala momakaa mamudhaakana Incia apekalangakomiu ande akawa wakutuuna.

⁷ Pasaraakaakea bhari-bharia imeriakamu i Aulata'ala, roonamo Incia mofaduliakako.

⁸ Ingkomiu tabeana usadara tee ukojaga-jaga, roonamo Ibilisi o musumiu. Incia mboomo singa mokomburu molingkana mopekatiitiina mopeelona kinandena to adhokua.

⁹ Ewangimea tee iimani momatangka, roonamo umataua ande manga witinaimiu sa'agama i saangua dunia sii anarakaa uka mboomo ingkomiu.

¹⁰ Aulata'ala o minaana bhari-bharia rahumati, mokembakomiu mamudhaakana upesua tee unamisi kamuliangina mobakaa alaloi Al Masi. Incia bheapamondokomiu, bheadhawuakakomiu kapoolina mamudhaakana usabara, bheapekakaakomiu, tee bheapekatangkakomiu sapadhana unamisi kanarakaa inda momangenge sumai.

¹¹ Inciamo mokokuasana sa'umurua! Amin.

Salamu
5:12-14

¹² Suraku momampodhona sii kuburia to ingkomiu tee kahambana Silwanus iabhiku samia witinai momembalina motoparacaea, siitumo to kuudhaniakakomiu tee kupayaakiniakakomiu ande o antona sura iburiku incia sii pokaiana tee kadhaangiamiu satotuuna o rahumatina Aulata'ala. Jadi ingkomiu tabeana upengkeni pekatangka i nuncana rahumati sumai.

¹³ Manga witinaita modhaangiana i "Babel,"‡ motopilina mopokanana tee ingkomiu uka, alamboko salamuna to ingkomiu. Markus o anaku alamboko uka salamuna.

¹⁴ Posalasalamumo podho-podho ingkomiu tee salamu momangkilo mobukeakana kaasi. Maasangia bhari-bharikomiu modhaangiana i nuncana Al Masi udhadhi pomalape.

5:12 5:12 Tul. 15:22; 15:40. **5:13 5:13** Tul. 12:12; 12:25; 13:13; 15:37-39; Kol. 4:10. ‡ **5:13 5:13** *Manga witinaita modhaangiana i "Babel":* Babel sii aipomo saro rahasia to asarongiaka kota Roma. Jadi manga ahaliina kitabi aabhia o giu incia sii o pokaiana tee gareja modhaangiana i Roma, siitumo tampana mbooresana Petrus wakutuuna aburi sura incia sii. Kota Babel satotuuna ibu kotana Tana Mesopotamia, tampana manga miana Israel atobhanaka sapatdhana atopadhencu minaaka i tanana karon a manga incia kera-kera i zamani 600 tao wakutuu indapo laahiriana Al Masi (kamata 2Taw. 36:17-21). Aipomo Petrus apake saro kaabhi-abhi incia sii to apamembalia kaudhania ande manga mia moparacaeana tee Isa satotuuna o manga pande bhose i dunia sii.

Kitabi Momangkilona Wolio

Wolio: Kitabi Momangkilona Wolio (New Testament+)

copyright © 2024 Wycliffe Bible Translators, Inc.

Language: (Wolio)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-10

PDF generated using Haiola and XeLaTeX on 10 Jul 2025 from source files dated 10 Jul 2025

7df9af1f-1c49-59d2-a164-bde0a20127b3